

## SU SCOLLIU 'E ARRODINI

In cuss'era sa bidd'e 'e Pula contada, agiumai sescentus cincuenta animas, intra massajus e pastoris, s'in prus giorronaderis, is prus assotaus imbecis fiant accordaus cun is mannus totu s'annu. Seus in su 1886; sunt passaus 43 annus apustis de su feudatariu poderi in Sardinnia, abboliu de Carlu Albertu, rei bonu piemontesu. Nointamus, immoi puru, po intzimia de sa luitzioni de s'era passada, sighint is dannus economicus e sotzialis, apustis de cuatruxentus annus de amministradura ispanniola chi iat intregau sa Sardinnia a su Piemonti cun 152 dominarius e tenimentus, governaus de sennoris margianatzus, in d-una popolazione de 310.000 personis. A centru de costa marigosa beridadi, bivit su pulesu e cant' 'e is atrus simbilis est a connoscentzia chi in Sardinnia esistit, de logu in logu, un'economia destruida, unu cumerciu atzopiau po mor' 'e is medas datzius asub' 'e una populatzioni abbisongiosa e ocasionada de meda tribbulias. Intra 'e is montis e campurias chi ingiriant totus is lacanas de s'isterriu territoriu, de 34.500 mois, issu afrontat de soli in soli is fitianas fainas cun umilesa passientziosa. Unu fatu nodiu iat perou scotzinau costa realidadi sonnigosa, incapitau in sa bidd' 'e Pula su 28 de su mes' 'e ladamini de su 1886, in d-una dii de strasura, po mor' 'e Melis Puddu Sarbadori, lacuinesu chi iat atriviu sa vida sua po salvai una giovunedda. A primu noti de sa dii 'e strossa si pesat una temporada, cun proidura for' 'e contu, bentu malu in terra e in mari; acua a arrius iscurrit pressosa formendi garropus in basciuras. Portas tancadas a siddhadura stesiant allagaduras aintr' 'e is domus. Scrillitus de pipius spramaus de sa timoria, acarragiant sa moid' 'e su mari arrenegau, faint axiadessa de is mammas coidosas. Mulleris apensamentadas abetant, de ora in ora, su furriu de is pobidhus, bessius in pressi a coili, po acorrai su bestiamini ispainau.

A obrescidroxiu su cumandu de Finantzia 'e Casteddu avvisat chi unu "SCHOONER" velieru a duus pinnonis de natzionalidadi disconnota, a intr' 'e noti s'est truncau in is iscollius, a duxentus metrus de sa plaia 'e S. Efis e chi personis de s'echipagiu cun d-una femina puru agitoriant su salvamentu. Su sindigu cav. Dotori Carlu Brundu fait tzerriai, de apretu, is contzilleris de sa Giunta comunali e impari a su Pretori, su dotori medicu, su secretariu currint de pressi cun i primus arrecatus. Lompus a logu, benint a isiri, de sa testimonia de is cinqu marineris salvaus, ca su capitano est isparessi in mari. Ant avverau su salvamentu de cussus mali assortaus, po mor' 'e sa presentzia de su bastimentu "Linda" de Livornu e de su barconi "La vergine di Bonaria" de Casteddu e de Efisiu Palla abbistu nadadori. De buca de is marineris pag'ora salvaus, sbatius de logu atesu croatus, dalmatus, e unu triestinu, sapint chi su velieru est austru-ungaricu, si narat "Formica" aundidhoi sunt arrescius su meri Ernestu Rodinis, sa filla e Giuanni Smircich marineri. Oindi medas pulesus no connoscint custu contu de istoria paesana, aicietotu, deu creu, is prus becius de s'eredu 'e Melis Puddu Sarbadori chi bivint a Lacuni. Su logu 'e su salvamentu si narat "Su scolliu 'e Arrodini" chi s'agatat in sa cala 'e Nora acant' 'e sa cresia 'e s. Efis e de is antigorius 'e sa citadi punicu-romana. Su mengianu

s'est incarrerau scuriosu e nebidatzu cun aera friarosa, atachendi donnia bisura. Scampiaada sa strossa 'e acua, su bentu malu s'est afortiau, colembrendi matas e iscirrochendi undas mannas contra is iscollius. Sa bidda s'est avvolotada; a tropas genti impressia s'incaminat conca a sant'Efis, tres chilomentrus e prus de tretu, a cuaddhu, a carru, a pei, con s'avocu de doani una manu 'e agiudu. In s'interis is tres mali assortaus, babu, filla e su marineri, sbandonant su velieru intra s'infrusada 'e is undas, acostaus 'e pari, apoderaus a una funi lompit a istentu a su scolliu acanta. Ernestu Rodinis est nasciu a Lussinpiccolo (Dalmazia) in su 1843; in pipiesa incarrerat sa vida 'e marineri. Imbatiu in America set cumandadori de una navi ligera in sa gherra 'e sucessioni. A bintidusannus est foressiu in Anghlitterra po no fai su sordau. In viudantzia fait costruiri "La Formica", furriada de parti in d-unu arrenconi po ingolli su pianoforti 'e sa filla Giuseppina chi acumpangiat su babu in is fitianas attraversadas. Essendi in sa massoneria, Ernestu est aculliu de bonu sestu in calisisiat portu. In custu viagiu chentz' 'e torrada "La Formica", partendi de Lussin Piccolo (isuledda a giossu 'e s'Istria) s'imbatit a Palermu po una carriga 'e arangiu e limoni; apustis a Kavala in Grecia po Tabacu, infinis a Cipru po binu druci e licorosu de Candia. De innia smasciat conca 'e sa Franzia peri su Mediterraneu e su canale 'e Sicilia. Abbaliau custu tretu 'e mari atobiat una furiosa temporada a ponenti 'e sa Sardinnia. A su de tres dis sa strossa no s'est apaxiada. Perdiu "su puntu navi" su capitanu, a urtimu consideru, creit de essi lompiu a sa costera tunisina, imbecis, "La Formica" ingollia de currenti 'e a traconartza s'iscirrocada contra is iscollius a pillu 'e acua, aturendi incallida a pagu tretu de sa cresia 'e s. efis. Sonus tzacarrosus de linna truncada si pesant in s'aeri, insurdant repenti sa moida 'e is acuas trumbulladas. Carradas sciasciadas spainant a mari colori e fragu de binu licorosu. In mesu 'e sa frusa afrontat po primu su tretu 'e mari su cani terranova, fideli amigu de Ernestu e Giuseppina, lompit a terra campau de dannu. A custu puntu su meri 'e sa barca, omini de ispreni in s'astragori de is acua malas, offerit 100 francus po su salvamentu, aumentaus, fatu fatu, a 150, 200 e 500, ma nemus de is personnis approilladas e de is balentis nadadoris de bidda no atrivid detzididuras. Aconcant a custu impergiu pretocau, Efis Palla e flaviu Lubranu de Livornu, ma si storrant de sa faina, po mor' 'e su cansamentu fatu innantis. Apustis de tanti cun d-una funi scuta atocatoca arrenescint a salvai a Giuanni Smircih, chi in s'interis iat aconcau a sa incalliosa attraversada, abandonendi Ernestu e Giuseppina giuntus a pari. Siguramenti dhoi iat essi mortu allupau si s'agiudu no fessit imbatiu a tempus. Su bentu malu no tenit ora de s'asseliai; a tradu mengianu candu s'isperat de scampiai s'est fatu prus frusiosu. Aici is undas abumbant sempiri in peus, s'arrogant cun d-unu isciarrocu ispramosu contra su velieru po metadi acovecau. In d-unu inferru chepari no est isceti atriviu chinisisiat tentit unu salvamentu, ma est pretocau in totu! In custu afasciu Ernestu Rodinis pedit su capitanu Guerri, de sa "Linda" de Livornu, unu mezu calisisiat po salvai a issu e a sa filla promittendi a a is picocus alentosus un'acumpentzu chentz' 'e misura. Ma francu e sardu dhi arrespundint chi donnia agiudu est privu de furtuna, storrendiddhu de ponni in

tribulia sa vida ‘e cancunu, chi ingrangulau de sa promissa fata, si fessit ghetau a mari. In mesu a custu disisperu picocus geniosus imbentant s’urtima pensada, acapiant a pari unas cantu bigas e atrus petzus lebius a ingruxadura, po bogai fora de dannu babu e filla ammodhiaus cola cola. Imbolendi una funi a curtzu iat steti sa salvesa insoru, ma su capitane Guerri, chi podiat tenni assigraus otuxentus francus de accumpentzu, scontroriat s’urtimu disinnu alidantzosu nasciu in d-unu momentu de grandu afrigimentu. Is undas si pesant sempri prus artas e Rodinis, timendi a sa peus cosa, acapiata sa filla a su scolliu, e cun arriscu mannu nadat conca a su velieru chentza dhoi podit ampuai, fortzis po colliri paperis e prendas allogadas. Ismasciat anch’e Giuseppina chi tzerriat agitoriu e ddh’assicurat cun fortilesa a su scolliu prus artu. Torrat a furriai conca’su velieru po provai un’atera borta, ma dhoi morit allupau, accarraxau de s’unda manna, cudda chi lompit donnia seti cumentis narant is marineris. Sa marea pigat sempri prus a pitzus; is undas frusiosas s’arrogant in s’oru ‘ mari e cumente ‘e tronu sculant donnia avocu. Sa vida ‘e Giuseppina est lompia a s’urtimu riciru, cumbinta ca nemus dha potzat campai de dannu. Facia a s’ora ‘e mesudi’, candu is 200 personis e prus atopadas, cumovias, e timarosas chi abetant s’acabbu de custa disdicia, s’acciungit sa personi de Melis Puddu Sarbadori, allumingiau Lacunesu, po mor’ ‘e sa biddu ‘e su nascimentu suu. De arti cassadori e carnatzeri lompiu pag’ora de biddu chentza ‘e isciri ita est sutzedendi, aici puru de s’accumpentzu de 500 francus. Sarbadori tenit trintunuannu, est balenti, atzudu e abbistu nadadori. Narant ca apat lassau Lacunni po una peca. Bagadiu bivit in biddu de paricius annus. Giompau a logu osservat sa strossa ‘e is acuas; a primu est dudosu mancai siat omini de arbitiu, apustis bincit asuba ‘e donnia atru sentidu, s’impetu de su bonu coru, po ponni in salvamentu a sa pobera Giuseppina. In faci a su consulu austriacu chi iat afiantzau po sa familia sua, deccarat de salvai a sa malasortada. Deretu si spollat de giacheta e cratzonis; cun d-una funi acapiada a chintzu e trogada a coddu, incarrerat a s’incalliosa attraversada. Is undas ddh’atumbant cun poderiu spingendidhu fora de filada, e pagu mancat ca si dhoi isfascit contra su marragiu. Accarraxau de is acuas malas, a puntu ca po unu gradixedhu no si bidit prus nuddha de sa carena sua. Perou issu sorigat cun atrivimentu in su pensamentu suu, torrendi a pigai a bellu a bellu su tretu giai fatu a su de tre unu. Apustis de una cumbata a serru a serru, cansau e feriu a is cambas, lompit a su scolliu prus acanta e inguni si pasiat po pag’ora. Tandue, stesiau e scascadhau de sa currenti nadat cun prus calentesa, infinis lompit a logu afestau cun grandu tzacarramanu. Deretu strogat sa giovonedda totu atitirigada, avatu acapiat a unu spuntone ‘e arroca sa funi ingorta cun issu e imperiat a Giuseppina chi si dhoi aguantit a manu sidadha. Su logu ‘e su salvamentu est, duncas, in s’imperriu intra is arrocas de su marragiu e duus iscolliis stesiaus a pagu tretu de pari. Sarbadori ismasciat a giossu cun prus incanimentu e acapiat a su scolliu ainnu si fiat pasiau, s’atru cabudu de sa funi chi portat a tira, parada a ghetu de cordoni ‘e salvamentu. Totu custu est cumpriu cun segurantzia, ispantosa lestresa e sanguni fridu, de s’omini balenti Sarbadori, prontu a morri intamis de indulli. Torrat a furriai faci a

Giuseppina chi incoragit cun ternuria e piedadi a dhi ponni infatu; aici apompiendiddha cun d-una manu, nadat cun d-unu bratzu solu, de pertantis issa si poderat a sa funi atendiada. In custa incalliosa torrada una gintoria atrudia abetat in s'oru 'e mari sa discinida de su salvamentu; sarbadori tentat de binci sa incotzada frusiosa de is undas mumugioladas in sa imperrada de is duus iscollius. Sa faina apenas aconcada abisongiat de meda sperditziu de balia, pruschetotu de parti 'e Giusepina chi est a s'urtimu arrematu. Sarbadori agiummai assubentau po sa isteniada fadia, cun trincus in totu sa carena, curtu de is undas spumosas e amaletzosas, fait pensai prus a su tocu de s'ora mala chi no a sa lompida de sa bona sorti. Tudaus, tumbaus de s'acua bocidora, chentz' 'e torrai sulidu in setiu; arrenescint a s'apiculai a suba 'e is spuntonis de s'urtimu scolliu, cussu prus acanta de s'oru 'e mari, sempri giuntus a sa funi chi portant a tira. Sarbadori de nomini e de operas, apustis de un'atera cumbata for' 'e contu, accarraxau de is acuas mannas, salvat a Giusepina e lompit a terra cant' 'e un'eroi afestau de totu sa bidida, pruschetotu de Efis Palla e Flaviu Lubrano. In pressi manus piedosas incarrutzant a Giusepina in su letu de una cumbessia a palas de sa cresia de s.Efis, po donai is primus acunortus. Feminas coidadosas atendint a sa poborita cun bistuariu isciutu, cafeu callenti, pistocus e mexinaduras de ollu 'e tostoini po allebiai is trincus insangrentaus, si intreverant a conca 'e letu in su tebidori 'e sa ziminera. Giusepina assora tenit 18 annus cumprius, est acullia de sa bidida 'e Pula po mesis e mesis, atendia de genti allena e de s'Aministradura Comunali. Sanada de unu totu, torrat anch'e su tziu a Livornu apustis a Lussinu. Po totu vida allogat su bistiri 'e su salvamentu, invecis sa funi nodia est pratzia a tancheddhus coment' 'e punga intra 'e sa genti aproillada. Po arreconoscentzia de su beni arriciu, donat a sa cresia 'e Pula un'armoniu, oindi no prus a logu. Giusepina no tasit mai su raportu cun sa Sardinnia, bonu sentidu eredau de is nebodis de oi, lompius tre annus passaus, a sa Comuna de Pula po saludai su Sindigu. Issa morit in su 1962 a 94 annus de edadi. A suba 'e s'avanzada aprobada a totucantus votus de sa Comuna, benit cuncedia sa medallia a su balori de marina, a Melis Puddu Sarbadori lacunesu, po s'atribidura cumpria. Aici accabat custu pitzueddhu de istoria pulesa, balentia de Sarbadori chi arrefudat 500 francus de acumpentzu, mannesa de is Melis pulesus de su quartu eredeu!

Pula su 22 de austu 2002

Bissenti Congiu